

## 2 THESSALONIANS

<sup>1</sup> Paul, Silas, Timothy nurna pepa nhanha yairnama Altjirra worlamparinyurna, Thessalonica town-ala. Altjirra Kaarta nurnakanhala rrankarranha tangkalhelakala, Ingkarta Jesua Kristarlarlanga. <sup>2</sup> Altjirra Kaartanha, Ingkarta Jesua Kristanha turta, rrankangarra ngwanga kuta ntelalhama, rilhera turta.

*Paul-ala Altjirranha etnakakwia dangkilaka, era etnakakwia Altjirruna ingkaka turta*

<sup>3</sup> Tjina ntjarrai, nurna Altjirranha kutatha rrankangkarrakwia dangkilama, rrankarra erinha ekarlamekarlta tnakamanga, rrankarra turta kngarramakngarra urlarrakurlarra kangkintja ntelalhamanga. <sup>4</sup> Lakinhang nurna rrankarranha Altjirra worlamparinya arrpunha ntjarranga urlarra tnantjama. Nurna etnanha ilama rrankarra kunpa nyingalauwumanga. Nurna turta etnanha ilama rrankarra Kristanha ekarlta kuta tnakamanga, arrpunha ntjarrala rrankarranha tutjika lurnamangatanya, nakapakarlilamanga turta.

<sup>5</sup> Nurna kaltja Altjirrala kutatha arratja tjiperrawuma. Lakinhang rrankarra lyarta ekurakwia nyingalauwumalanga, Altjirrala rrankarranha anma pmara makalaria ekuranhurna irrpulhelitjina. <sup>6</sup> Altjirranha arratja inthorra nama. Era kala relha lenha ntjarranha kapanha nakapakarlilitjina, etnala

rrangkarranha lyarta nakapakarlilamanga. <sup>7</sup> Era rrangkarranha imampurla rrakangkarranhanga tangkalhelitjina, nurnanha turta, Ingkarta Jesuanha angel ekarlta ekuranha ntjarrakarta pitjalpumalanga, <sup>8</sup> urakarta.

Erantama relha lenha ntjarranha rrarrathala tutjina, etnala Altjirraka kotna namanga, etna turtala Ingkarta nurnakanha, Jesuaka, Yia Mar-raka itja kangkwerramanga. <sup>9</sup> Altjirralla etnanha kutantaka yirralhelitjina. Nhanhatitja era etnanha Ingkartanga kutantaka naamalhelitjina. Etnantama itja kuta Ingkartaka pmara makalariurna irrputjina. <sup>10</sup> Nhanha kala lakinherritjina Ingkartanha pitjalpumalanga. Arlta lenha ekurala, relha alknaltara ekuranha ntjarralla erinha tnantjitjina. Relha etnala erinha tnakakala, etna erinha ilitjina era makalaria inthorra namanga. Rrangkarra turta relha nhanha etnakalela nitjina, rrangkarra angkatja nurnakanha tnakakalanga.

<sup>11</sup> Altjirralla rrangkarranha nhanga urrarakaa. Nurnantama kutatha ekururna ingkama, rrakangkarrakwia, era rrangkarranha ntarntaritjika, rrangkarra paalapaalerrakitja. Nurna turta ekururna ingkama, rrakangkarrata tangitjala nitjika marra kuta ntelalhitjika, nhanga rrangkarralla antjerramanga ngerra. Ekarlta warta, era kala rrakangkarralla irrpalthala tangitjala nama. <sup>12</sup> Nurna lakinha ingkama, relhalla Ingkarta Jesuanha tnantjitjinanga, etna aramalanga rrangkarra arratja ntelalhamanga. Kurunga Ingkarta Jesualla rrangkarranha turta tnantjitjina. Nhanha lakinherritjina, Altjirra

nurnakanha, Ingkarta Jesua Kristanha turta, nurnaka ngwanga ntelalhamanga.

## 2

### *Altjirraka leltja kngarra era*

<sup>1</sup> Ingkarta nurnaka Jesua Kristanha pitjalpumalanga, Altjirralla nurnanha worlilitjina Jesua Kristurna urlarrakurlarra lhitjika. Lakinhanganga, tjina ntjarrai, <sup>2</sup> rrangkarra itja thakerritjika, rwampierritjika paka, arrpunha ntjarrala rrangkarranha ilamanga, Kristanha kula kala pitjalpukala. Thunga etna rrangkarranha ilitjina, Enka Alkngaltarala etnanha nhanha ilakala. Thunga etna rrangkarranha ilitjina, relha arrpunhala etnanha nhanha ilakala. Thunga etna rrangkarranha ilitjina, etna nhanha pepa nurnakanhala read-errakala. <sup>3</sup> Rrangkarra pula itja angkatja orrtjerrintja etnakanha tnakitjika. Arai, relha ntjarrataka Altjirraka irrpaltherritjikarrka. Altjirraka Leltja Kngarra nhanga turtarrka pitjitjika, artwa Altjirralla imilakala nhanga purrama. Kurunganta Ingkartanha pitjalputjina. <sup>4</sup> Altjirraka Leltja Kngarra nhanha era Altjirraka, relhaka turta irrpaltherritjina. Era Altjirraka temple-urna irruputjina, era turta ilalhitjina era altjirra namanga. <sup>5</sup> Rrangkarra ilpangkamama? Atha nhanga rrangkarranha lakinha ilaka, yinga rrakangkarralela namalangantema.

<sup>6</sup> Rrangkarra kala kaltja, Altjirralla Leltja Kngarra erinha anmakarrka parrama. Era

turta erinha antala ekuranhalanta kathilitjina. <sup>7</sup> Arai, Leltja Kngarra era lyarta kala urrkapuma, lauwulhintja pula. Altjirrala pula erinha anmakarrkantema impuma. <sup>8</sup> Kurunga Altjirrala Leltja Kngarra erinha kathilitjina. Ingkarta Jesualantama erinha aiyangkintja ekuranhala yirralhelitjina, era pitjalpumalanga, makalaria inthorra turta ntelalhamalanga.

<sup>9</sup> Leltja Kngarra era pitjimalanga, Satan-ala erinha ekarltilitjina. Erantama tjatjickartalka urrkapumala, relha ntjarranha orrtjapepilitjina. <sup>10</sup> Era relha nhanha etnanha orrtjapepilitjina, Altjirrala relha nhanha etnanha kala imilakalanga. Arai, Altjirrala etnanha tangkalhelamara, etna pula itja angkatja nthurrpaka kangkaka, angkatja erinha tnakaka paka. <sup>11</sup> Altjirra erarrpantama relha nhanha etnanha parrpartilitjina, etna angkatja orrtjerrintja erinha tnakitjinanga. <sup>12</sup> Lakinha era relha ingkarrakanha imilitjina, etnala angkatja nthurrpa erinha itja tnakakala, etna turtala kangkakala kornatitja ntelalhitjika.

*Tnoatnoa narrirrai Altjirrala rrankarranha urrarakalanga*

<sup>13</sup> Tjina ntjarrai, Altjirranha kunha rrankangkarra kangkaka. Nurnakathaka turta nama Altjirranha kutatha rrankangkar-rakwia dangkilitjika. Iwunhanga? Era rrankarranhakimparra urrarakalanga, tangkalhelitjika. Erantama rrankarranha tangkalhelaka, Enka ekuranhala rrankarranha alknaltarilamalanga, rrankarra turta

angkatja nthurpa erinha tnakamalanga.  
<sup>14</sup> Altjirralla nhang rrankarranha urraraka,  
 nurna rrankarranha Yia Marra nurnakanha  
 kaltjinthamalanga. Era rrankarranha  
 urraraka, rrankarra turta Ingkarta nurnaka  
 Jesua Kristalela nitjinanga, pmara makalaria  
 ekuranhala. <sup>15</sup> Lakinhang, tjina ntjarrai,  
 rrankarra itja angkatja ekura kngwerritjika,  
 angkatja nhang nurnala rrankarranha  
 kaltjinthakala, pepala yairnakala turta.

<sup>16-17</sup> Altjirra Kaarta nurnakanha, era nur-  
 naka kangkama. Era ngwanga nama. Era  
 nurnanha alkngolkngilama, ngampakala. Era  
 nurnanha tnoatnoilama Jesuaka kunpa kaaral-  
 hitjika. Jesua Krista erarrpa, Altjirra Kaarta era  
 turta, rrankarranha tjiptjipilitjina, rrankar-  
 ranha ekarltilitjina turta, marra kuta angkitjika  
 pa ntelalhitjika.

### 3

#### *Nurnakakwia Altjirruna ingkarrirrai*

<sup>1</sup> Kala nhanhantantama tjina ntjarrai. Nur-  
 nakakwia Altjirruna ingkarrirrai. Ingkarrir-  
 rai arrpunhala itja Ingkartaka angkatja parritji-  
 nanga. Ingkarrirrai relha ntjarrala angkatja  
 erinha kangkintjala wutjinanga, rrankarrala er-  
 inha kangkintjala wukala ngerra. <sup>2</sup> Ingkarrirrai  
 Altjirralla nurnanha relha kornanga, arrthatanga  
 turta ntarntaritjika. Relha arrpunha ntjarrala  
 kunha Altjirranha itja tnakama. <sup>3</sup> Ingkartala  
 pula rrankarranha itja ipmintja imputjina.  
 Era kala rrankarranha ekarltilitjina. Era

turta rrangkarranha errintjanga ntarntaritjina. <sup>4</sup> Nurna turta kaltja rrangkarra angkatja nurnakanhaka kangkwerrama, kuta kangkwer-ritjina turta, Ingkartanha rrakangkarra tangitjala namanga. <sup>5</sup> Yinga turta Ingkarturna ingkama era rrangkarranha kuta ilpangkalhelitjika Altjirranha rrakangkarra kangkamanga, Kristanha turta rrakangkarra kuta montjamontja ntelalhamanga.

*Itja kaningka nitjika, urrkaputjika pula*

<sup>6</sup> Tjina ntjarrai, atha rrangkarranha tjatjatuma, Ingkarta Jesua Kristaka rretnyala. Rrangkarra tjina tnakanhakanha nyintaminyintanga paater-ritjika, erala itja marna ekuranhaka urrkapumanga, nurnala rrangkarranha kaltjinthakala ngerra. <sup>7</sup> Rrangkarra kala kaltja, rrangkar-rataka nurna ngerra ntelalhitjika. Nurna nhanga rrakangkarralela namalanga, nurna itja kunpa narlanaka. <sup>8</sup> Nurna turta itja arrpunhaka marna ankea wara ilkurlanaka. Nurna pula tjarrilp-mintja urrkapuka, nurna itja rrangkarranha inporilitjinanga, marna rrakangkarranha ankea ilkumala.

<sup>9</sup> Nurnakathaka nthurra kala naka marna rrakangkarranha kapanhanta ankea ilkutjika. Nurna pula antja naka rrangkarranha tjaiya arratja erinha ntelitjika, rrangkarra turtantama tjaiya ekurala lhitjinanga. <sup>10</sup> Arai, nurna nhanga rrakangkarralela namalangan-tema, nurna rrangkarranha ilaka, relha paka itja antja namanga urrkaputjika, era kala mar-nakunya nitjika. <sup>11</sup> Lyarta pula nurna wuma

urrputja arrpunha kunpa narlanamanga, urkaputjikanha. Etna yia kartanta nthulapuma. <sup>12</sup> Relha nhanha etnanha nurna Ingkarta Jesua Kristaka rretnyala ilama, itja yia kartanta nthulaputjika. Kala marna rrakangkarranhakanta urrkapai. <sup>13</sup> Tjina ntjarrai, rrangkarrataka itja porrkerritjika arratja ntelalhitjika.

<sup>14</sup> Relha arrpunha paka itja kangkwerramanga, angkatja nhanga nurnala rrakangkarrurna intalhelama, rrangkarra ekuranga aralhitjika. Rrangkarra itja ekuralela ilkwatharra nitjika, era paka poreritjinanga. <sup>15</sup> Rrangkarra pula itja ekura leltja ngerra ntelalhitjika. Erinha montjala tjatjatwai, era tjina tnakanhakanha namanga warta.

#### *Anparnintja ingkarninya*

<sup>16</sup> Ingkarta rilhera era rrakangkarra kutatha rilhera ntelalhama. Ingkarta era turta rrakangkarralela kutatha ilkwatharra nama.

<sup>17</sup> Paul atharrpantama rrangkarranha anparnama, angkatja urrputja nhanha iltja nukanhala intalhelamala. Lakinha rrangkarra kaltja nitjina atharrpa pepa nhanha rrakangkarrurna yairnakala.

<sup>18</sup> Ingkarta nurnakanha Jesua Kristanha rrakangkarra ingkarrakaka kuta ngwanga ntelalhama.

**Altjirraka angkatja - Arrarnturna  
kngartiwukala  
The New Testament in the Western Arrarnta  
language of Australia**

copyright © 1997 Bible Society of Australia

Language: Western Arrarnta (Arrarnta, Western)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

---

PDF generated using Haiola and XeLaTeX on 11 Nov 2022 from source files dated 22 Nov 2019

e7dac67a-727e-547f-9edb-55e6c28bb3b9